

223927

樂府詩集
(上)

中華書局印行



樂府詩集

75063

《四部備要》

集部

上海中華書局據汲古閣

本校刊

桐鄉 陸費達總勘

杭縣 高時顯輯校

杭縣 吳汝霖監造

版權所有不許翻印

樂府詩集卷第三十六

太原

郭茂倩

編次

相和歌辭

清調曲

秋胡行四解

魏武帝

西京雜記曰魯人秋胡娶妻三月而遊宦三年休還家其婦採桑於郊胡至郊而不識其妻也見而悅之乃遺黃金一鎰妻曰妾有夫遊宦不返幽閨獨處三年于茲未有被辱於今日也採桑不顧胡慙而退至家問妻何在曰行採桑於郊未返既歸還乃向所挑之婦也夫妻並歎妻赴沂水而死列女傳曰魯秋潔婦者魯秋胡之妻也既納之五日去而宦於陳五年乃歸未至其家見路傍有美婦人方採桑而說之下車謂曰力田不如逢豐年力桑不如見國卿今吾有金願以與夫人婦曰採桑力作紡績織紵以供衣食奉二親養夫子已矣不願人之金秋胡遂去婦至家奉金遺母使人呼其婦婦至乃嚮採桑者也婦汗其行去而東走自投於河而死樂府解題曰後人哀而賦之爲秋胡行若魏文帝辭云堯任舜禹當復何爲亦題曰秋胡行廣題曰曹植秋胡行但歌魏德而不取秋胡事與文帝之辭同也

晨上散關山此道當何難晨上散關山此道當何難牛頓不起車墮谷間坐盤石之上彈五弦之琴作爲清角韻意中迷煩歌以言志晨上散關山解有何三老公卒來在我傍有何三老公卒來在我傍負掉被裘似非恆人謂卿云何困苦以自怨惶惶所欲來到此間歌以言志有何三老公解我居崑崙山所謂者真人我居崑崙山所謂者真人道深有可得名山歷觀遨遊八極枕石漱流飲泉沉吟不決遂

上升天歌以言志我居崑崙山解去去不可追長恨相牽攀去去不可追長恨相牽攀夜夜安得寐惆悵以自憐正而不譎辭賦依因經傳所過西來所傳歌以言志去去不可追解

同前五解

武帝

願登泰華山神人共遠遊願登泰華山神人共遠遊經歷崑崙山到蓬萊飄飄八極與神人俱思得神藥萬歲爲期歌以言志願登泰華山解天地何長久人道居之短天地何長久人道居之短世言伯陽殊不知老赤松王喬亦云得道得之未聞庶以壽考歌以言志天地何長久解明明日月光何所不光昭明明日月光何所不光昭二儀合聖化貴者獨人不萬國率土莫非王臣仁義爲名禮樂爲榮歌以言志明明日月光解四時更逝去晝夜以成歲四時更逝去晝夜以成歲大人先天而天弗違不咸年往憂世不治存亡有命慮之爲蚩歌以言志四時更逝去解戚戚欲何念歡笑意所之戚戚欲何念歡笑意所之壯威智惠殊不再來愛時進趣將以惠誰汎汎放逸亦同何爲歌以言志成威欲何念解

右二曲魏晉樂所奏

同前三首

魏文帝

堯任舜禹當復何爲百獸率舞鳳凰來儀得人則安失人則危唯賢知賢人不易知歌以詠言誠不易移鳴條之役萬舉必全明德通靈降福自天

朝與佳人期日夕殊不來嘉肴不嘗旨酒停杯寄言飛鳥告余不能俯折蘭黃仰結桂枝佳人不在結之何爲從爾何所之乃在大海隅靈若道言貽爾明珠企予望之步立躊躇佳人不來何得何須汎汎激池中有浮萍寄身流波隨風靡傾芙蓉含芳齒齒垂榮朝采其實夕佩其英采之遺誰所思在庭雙魚比目驚鵲交頸有美一人婉如青揚知音識曲善爲樂方

同前二首

傅玄

秋胡子娶婦三日會行仕宦既享顯爵保茲德音以祿頤親韞比黃金觀一好婦採桑路傍遂下黃金誘以逢卿玉磨逾繁蘭動彌馨源流潔清水無濁波奈何秋胡中道懷邪美此節婦高行巍峨哀哉可愍自投長河

秋胡納令室三日官他鄉皎皎娶婦姿冷冷守空房燕婉不終夕別如參與商憂來猶四海易感難可防人言生曰短愁者苦夜長百草揚春華攘腕採桑素手弄繁枝落葉不盈筐羅衣繫玉體回目流來車君子倦仕歸車馬如龍驤精誠馳萬里既至兩相忘行人悅令顏一作息此樹傍誘以逢卿喻遂下黃金裝烈烈貞女念言辭厲秋霜長驅及居室奉金升北堂母立呼婦來歡情樂未央秋胡見此婦惕然懷探湯負心豈不慙永誓非所望清濁必異源鳬鳳不並翔引身赴長流果哉娶婦腸彼夫既不淑此婦亦太剛

同前

陸機

道雖一致塗有萬端吉凶紛議休咎之源人鮮知命命未易觀生亦何惜功名所勤

同前七首

嵇康

富貴尊榮憂患諒獨多富貴尊榮憂患諒獨多古人所懼豐屋郭家人害其上獸惡網羅惟有貧賤可以無它歌以言之富貴憂患多貧賤易居貴戚難爲工貧賤易居貴戚難爲工恥佞直言與禍相逢變故萬端俾吉作凶思牽黃犬其莫之從歌以言之貴戚難爲工勞謙有悔忠信可久安勞謙有悔忠信可久安天道害盈好勝者殘彊梁致災多招禍患欲得安樂獨有無怨歌以言之忠信可久安役神者弊極欲疾枯役神者弊極欲疾枯顏回短折不及童烏縱體淫恣莫不早徂酒色何物今自不辜歌以言之酒色令人枯絕智棄學遊心於玄默絕智棄學遊心於玄默過而悔當不自得垂

釣一壺樂一國被髮行歌和者四塞歌以言之遊心於玄默

思與王喬乘雲遊八極思與王喬乘雲遊八極凌厲五岳忽行萬億授我神藥自生羽翼呼吸太和鍊形易色歌以言之之行遊八極徘徊鍾山息駕於層城徘徊鍾山息駕於層城上蔭華蓋下采若英

受道王母遂升紫庭逍遙天衢千載長生歌以言之徘徊於層城

同前二首

謝惠連

春日遲遲桑何萋萋紅桃含妖綠柳舒黃遊近聚者游諸戲蹊華顏易改良願難諧

係風捕影誠知不得念彼奔波意慮迴惑漢女倏忽洛神飄揚空勤交甫徒勞陳王

同前九首

顏延之

椅梧傾高鳳寒谷待鳴律影響豈不懷自遠每相匹婉彼幽閒女作嬪君子室峻節貫秋霜明豔侔朝日嘉運既從欣願自此畢

燕居未及歡良人顧有違脫巾千里外結綬登王畿戒徒在昧旦左右相來依驅車出郊郭行路正威遲存爲久離別沒爲長不歸嗟余怨行役三陟窮晨暮嚴駕越風寒解鞍犯霜露原隔多悲涼迴

感卷高樹離獸起荒蹊驚鳥縱橫去悲哉游宦子勞此山川路超遙行人遠宛轉年運徂良人一作時爲此別日月方向除孰知寒暑

積餽俛見榮枯歲莫臨空房涼風起坐隅寢興日已寒白露生庭無勤役從婦願反路遵山河昔辭秋未素今也歲載華露月觀時暇桑

野多經過佳人從所務窮窆援高柯傾城誰不顧弭節停中阿年往誠思勞路遠關音形雖爲五載別相與昧平生捨車遵往路覓

藻馳目成南金豈不重聊自意所輕我心多苦調密此金玉聲高節難久淹竭來空復辭遲遲前途盡依依造門基上堂拜嘉慶入

室問何之曰莫行采歸物色桑榆時美人望昏至慙歎前相持有懷誰能已聊用申苦難離居殊年載一別阻河關春來無時豫秋

至恆早寒明發動愁心閨中夜長歎悽悽歲方晏日落遊子顏
高張生絕絃聲急由調起自昔枉光塵結言固終始如何久爲別百
行愆諸已君子失明義誰與偕沒齒愧彼行露詩甘之長川汎

同前七首

王融

日月共爲照松筠俱以貞佩分甘自遠結鏡待君明且協金蘭好方
愉琴瑟情佳人忽千里空閨積思生

景落中軒坐悠悠望城闕高樹升夕烟曾樓滿初月光陰非或異山
川屢難越輟泣揜鈇姿搔首亂雲髮

傾魂屬但火搖念待方秋涼氣承宇結明燭燼皆流三星亦虛映四
屋慘多愁思君如萱草一見乃忘憂

杆軸一作袖鬱不諧契闊迷新故朔風欄上發寒鳥林間度客遠乏衣
裘歲晏饒霜露參差與別緒依遲一作起離幕

願言如可行信邁亦亡反瞻景不告勞瞻途望遠遠何以掩歸轍
妾事春晚送目亂前華馳心迷舊婉

椒佩容有結振芳岐路隅黃金徒以賦白珪終不渝明心良自皎安
用久一作彌過車反粉巷流目下西虞

披帷惕一作有一作望出西遲所欲彼美復來儀慙顏變欣矚蘭艾隔芳
藹涇渭分清濁去去夫人子請徇川之曲

同前

高適

妾本邯鄲未嫁時容華倚翠人未知一朝結髮從君子將妾迢迢東
路隄時逢大道無難阻君方遊宦從陳汝蕙樓獨臥頻度春彩落辭

君幾徂暑三月垂楊蠶未眠攜籠結侶南陌邊道逢行子不相識贈
妾黃金買少年妾家夫婿輕離久寸心誓與長相守願言行路莫多

情送妾貞心在人口日暮蠶飢相命歸攜籠端飾來庭闈勞心苦力
終無恨所冀君恩那可依聞說行人已歸止乃是向來贈金子相看

顏色不復言相顧懷慙有何已從來自隱無疑背直爲君情也相會

如何咫尺仍有情況復迢迢千里外此時願恩不顧身念君此日赴
河津莫道向來不得意故欲留規誠後人

瑟調曲

古今樂錄曰王僧虔技錄瑟調曲有善哉行隴西行折
楊柳行西門行東門行東西門行却東西門行順東西
門行飲馬行上留田行新城安樂宮行婦病行孤子生
行放歌行大牆上蒿行野田黃鸝行釣竿行臨高臺行
長安城西行武舍之中行雁門太守行豔歌何嘗行豔
歌福鍾行豔歌雙鳴行煌煌京洛行帝王所居行門有
車馬客行牆上難用趨行日重光行蜀道難行權歌行
有所思行蒲坂行採梨橋行白楊行胡無人行青龍行
公無渡河行荀氏錄所載十五曲傳者九曲武帝朝曰
自惜古公文帝朝遊上山明帝赫赫我徂古辭來日並
善哉古辭羅數豔歌行是也其六曲今不傳五嶽善哉
行武帝鴻鴈却東西門行長安長安城西行雙鴻福鍾
並豔歌行牆上難用趨行是也其器有笙笛節琴
瑟琴琵琶七種歌弦六部張永錄云未歌之前有七部
弦又在弄後晉宋齊止四器也

善哉行六解

古辭

樂府解題曰古辭云來日大難口燥唇乾言人命不可
保當見親友且永長年術與王喬八公遊焉又魏文帝
詞云有美一人婉如清揚言其妍麗知音識曲善爲樂
方令人忘憂此篇諸集所出不入樂志按魏明帝步出
夏門行曰善哉殊復善弦歌樂我情然則善哉者蓋歎
笑之辭也

來日大難口燥唇乾今日相樂皆當喜歡解經歷名山芝草鸞鶴仙

人王喬奉藥一丸解自惜袖短內手知寒慙無靈輒以報趙宣解三月沒參橫北斗蘭干親交在門飢不及食解歡日尙少戚日苦多以何忘憂彈箏酒歌解淮南八公要道不煩參駕大龍遊戲雲端解

同前七解

魏武帝

古公宣甫積德垂仁思弘一道哲王於茲解太伯仲雍王德之仁行施百世斷髮文身解伯夷叔齊古之遺賢讓國不用餓殂首山解智哉山甫相彼宣王何用杜伯累我聖賢解齊桓之霸賴得仲父後任賢刁蟲流出解五晏子平仲積德兼仁與世沈德未必思命解六仲尼之世王國爲君隨制飲酒揚波使官解

同前六解

武帝

自惜身薄祜風賤罹孤苦既無三徙教不聞過庭語解其窮如抽裂自以思所怙雖懷一介志是時其能與解守窮者貧賤惋歎淚如雨泣涕於悲夫乞活安能觀解三我願於天窮環邪傾側左雖欲竭忠誠欣公歸其楚解四快人由爲歎抱情不得敘顯行天教人誰知莫不緒解五我願何時隨此歎亦難處今我將何照於光曜釋銜不如兩解

同前五解

武帝

朝日樂相樂酣飲不知醉悲弦激新聲長笛吹清氣解一弦歌感人腸四坐皆歡悅寥寥高堂上涼風入我室解持滿如不盈有德者能卒君子多苦心所愁不但一解三慷慨下白屋吐握不可失衆賓飽滿歸主人苦不悉解四比翼翔雲漢羅者安所繫冲靜得自然榮華何足爲解五

同前六解

文帝

上山採薇薄莫苦飢溪谷多風霜露沾衣解野雉羣雛猿猴相追還望故鄉鬱何鬱鬱解高山有崖林木有枝憂來無方人莫之知解三人生如寄多憂何爲今我不樂歲其馳解四湯湯川流中有行舟隨波轉薄有似客遊解五策我良馬被我輕裘載馳驅聊以忘憂解六

同前五解

文帝

朝遊高臺觀夕宴華池陰大會奉甘醪待人獻嘉禽解齊倡發東舞秦箏奏西音有客從南來爲我彈清琴解二五音紛繁會拊者激微吟淫魚乘波聽躡躍自浮沉解三飛鳥翻翔舞悲鳴集北林樂極哀情來寥亮摧肝心解四清角豈不妙德薄所不任大哉子野言再弦且自禁解五

右六曲魏晉樂所奏

同前

文帝

有一美人婉如清揚妍姿巧笑和媚心腸知音識曲善爲樂方哀弦微妙清氣含芳流鄭激楚度宮中商感心動耳綺麗難忘離爲夕宿在彼中洲延頸鼓翼悲鳴相求眷然顧之使我心愁嗟爾昔人何以忘憂

同前八解

魏明帝

我徂我征伐彼蠻虜練師簡卒爰正其旅解一輕舟竟川初鴻依浦桓桓猛毅如龍如虎解二發炮若雷吐氣成雨旄旌指麾進退應矩解三百馬齊轡御由造父休休六軍咸同斯武解四兼塗星邁亮茲行阻行行日遠西背京許解五遊弗淹旬遂屆揚土奔寇震懼莫敢當御解六虎臣烈將憐憐充怒淮泗肅清奮揚微所解七運德曜威惟鎮惟撫反旆言歸旆入皇祖解八

同前四解

魏明帝

赫赫大魏王師徂征冒暑討亂振曜威靈解一汎舟黃河隨波潺湲通渠回越行路綿綿解二綵旆蔽日旌旄翳天淫魚濤濤遊嬉深淵解三唯塘泊從如流不爲單握揚楚心惆悵歌採薇心綿綿在淮流願君速捷解一作早旋歸解四

右二曲魏晉樂所奏

同前

謝靈運

陽谷躍升。虞淵引落。景躍東隅。晚晚西薄。三春煥敘。九秋蕭索。涼來
溫謝。寒往暑却。居德斯頤。積善熈譴。陰灌陽叢。凋華墮萼。歡去易慘。
悲至難樂。激涕當歌。對酒當酌。鄙哉愚人。戚戚懷瘼。善哉達士。溶溶
處樂。

同前

江淹

置酒坐飛閣。逍遙臨華池。神飈自遠至。左右芙蓉披。綠竹夾清水。秋
蘭被幽崖。月出照園中。冠珮相追隨。客從南楚來。爲我吹參差。淵魚
猶伏浦。聽者未云罷。高文一何綺。小儒安足爲。肅肅廣殿陰。雀聲愁
北林。衆賓還城邑。何用慰我心。

同前

僧貫休

有美一人兮。婉如清揚。識曲別音兮。令姿煌煌。繡袂捧琴兮。登君子
堂。如彼萱草兮。使我憂忘。欲贈之以紫玉尺。白銀璫。久不見之兮。湘
水茫茫。

同前

僧齊己

大鵬刷翩。謝溟渤。青雲萬層。高突出。下視秋濤。空渺瀰。舊處魚龍皆
細物。人生在世。何容易。眼濁心昏。信生死。願除嗜慾。待身輕。攜手同
尋列仙事。

來日大難

李白

來日一身。攜糧負薪。道長食盡。苦口焦唇。今日醉飽。樂過千春。仙人
相存。誘我遠學。海陵三山。陸憩五嶽。乘龍上天。飛目瞻兩角。授以
神藥。金丹滿握。蟪蛄蒙恩。深愧短促。思填東海。疆銜一木。道重天地。
軒師廣成。蟬翼九五。以求長生。下士大笑。如蒼蠅聲。

當來日大難

曹植

樂府解題曰。曹植擬善哉行爲日苦短。
日苦短。樂有餘。乃置玉樽。辦東廚。廣情故。心相於闔門。置酒和樂欣。
欣遊馬後來。袁車解輪。今日同堂。出門異鄉。別易會難。各盡杯觴。

同前


元稹

當來日大難行。前有坂後有坑。大梁側小梁傾。兩軸相絞。兩輪相撐。
大牛堅。小牛橫。爲啄牛背。足跌力穽。當來日大難行。太行雖險。險可
使平。輪軸自撓。牽制不停。泥濘漸久。荆棘旋生。行必不得。不如不行。

樂府詩集卷第三十六

東吳毛晉訂正

男展再訂



樂府詩集卷第三十七

太原 郭茂倩 編次

相和歌辭

瑟調曲

隴西行

古辭

一曰步出夏門行樂府解題曰古辭云天上何所有歷
歷種白榆始言婦有容色能應門承賓次言善於主饋
終言送迎有禮此篇出諸集不入樂志若梁簡文帝西
戰地但言辛苦征戰佳人怨思而已王僧虔技錄云隴
西行歌武帝碣石文帝夏門二篇通典曰秦置隴西郡
以居隴坻之西爲各後魏兼置渭州禹貢曰導渭自爲
鼠同穴卽其地也今首陽山亦在焉

天上何所有歷歷種白榆桂樹夾道生青龍對道隅鳳凰鳴啾啾一
母將九雛顧視世間人爲樂甚獨殊好婦出迎客顏色正敷愉伸腰
再拜跪問客平安不請客北堂上坐客歡讌饒饒清白各異樽酒上
上正華疏酌酒持與客客言主人持却略再拜跪然後持一杯談笑
未及竟左顧敕中廚促令辦羅餚慎莫使稽留廢禮送客出盈盈府
中趨送客亦不遠足不過門樞取婦得如此齊姜亦不如健婦持門
戶一勝一丈夫

同前

陸機

我靜如鏡民動如烟事以形兆應以象懸豈曰無才世鮮興賢

同前

謝靈運

昔在老子志一作理成篇柱小傾大綆短絕泉鳥之棲遊林壇一作壇
是閑韶樂半膳豈伊攸便胡爲垂枉從表方圓耿耿僚志慊慊丘園
善歌以詠言理成篇

同前

謝惠連

運有榮枯道有舒屈潛保黃裳顯服朱黻誰能守靜棄華辭榮窮谷
是處考槃是營千金不迴百代傳名厥包者袖忘憂者置何爲有用
自乖中原實摘柯摧葉頽條煩

同前三首

簡文帝

邊秋胡馬肥雪中驚寇入勇氣時無侶輕兵救邊急沙平不見虜嶂
嶮還相及出塞豈成歌經川未遑汲爲孫塗更阻康居路猶澀月暈
抱龍城星眉照馬邑長安路遠書不還寧知征人獨佇立

隴西四戰地羽檄歲時聞護羌擁漢節校尉立元勳石門留鐵騎冰
城息夜軍洗兵一作逢驟雨送陣出黃雲沙長無止泊水脉屢繁分
當思勒舞鼎無用想羅裙

悠悠懸旆旌知向隴西行滅竇驅前馬銜枚進後兵沙飛朝似暮雲
起夜疑城迴山時阻路絕水極稽程往年到支服今歲單于平方觀
凱樂咸飛蓋滿西京

同前

庾肩吾

借問隴西行何當驅馬征草合前迷路雲濃後暗城寄語幽閨妾羅
袖勿空榮

同前

王維

十里一走馬五里一揚鞭都護軍書至匈奴圍酒泉關山正飛雪烽
戍斷無烟

同前

耿緯

雪下陽關路人稀隴戍頭封狐猶未驅邊將豈無羞白草三冬色黃
雲萬里愁因思李都尉畢竟不封侯

同前

長孫左輔

陰雲凝朔氣隴上正飛雪四月草不生北風勁如切朝來羽書急夜
救長城道險行不前相呼抱鞍歇人寒指欲墮馬凍蹄亦裂射雁
旋无飢斧冰還止渴寧辭解圍關但恐乘疲沒早晚一作邊候空歸

來養羸卒

步出夏門行

古辭

邪徑過空廬，好人常獨居。卒得神仙道，上與天相扶。過謁王父母，乃在太山隅。離天四五里，道逢赤松俱。攬轡爲我御，將吾上天遊。天上何所有，歷歷種白榆。桂樹夾道生，青龍對伏趺。

同前四解

魏武帝

雲行雨步，超越九江之皋。臨觀異同，心意懷遊豫，不知當復何從經。過至我碣石，心惆悵我東海。此爲東臨碣石，以觀滄海，水何澹澹。山島竦峙，樹木叢生，百草豐茂，秋風蕭瑟，洪波湧起，日月之行，若出其中，星漢燦爛，若出其裏，幸甚至哉，歌以詠志，觀滄海。北風徘徊，天氣肅清，繁霜霏霏，鷗雁南飛，驚鳥潛藏，熊羆窟棲，錢鏐停置，農收積場，逆旅整設，以通賈商，幸甚至哉，歌以詠志。冬十月，解鄉土不同，河朔隆寒，流淅浮漂，舟船行難，雖不入地，豐積深奧，水竭不流，冰堅可蹈，土上一作隱者貧，勇俠輕非，心常歎怨，戚戚多悲，幸甚至哉，歌以詠志，河朔寒。神龜雖壽，猶有竟時，騰蛇乘霧，終爲土灰，驥老伏櫪，志在千里，烈士暮年，壯心不已，盈縮之期，不但在天，養怡之福，可得永年，幸甚至哉，歌以詠志，神龜雖壽。

同前二解

魏明帝

步出夏門，東登首陽山，嗟哉夷叔，仲尼稱賢，君子退讓，小人爭先，惟斯二子，于今稱傳，林鍾受謝，節改時遷，日月不居，誰得久存，善哉殊復善，弦歌樂情，商風夕起，悲彼秋蟬，變形易色，隨風東西，乃眷西顧，雲霧相連，丹竇蔽日，彩虹帶天，弱水滯滯，葉落翩翩，孤禽失羣，悲鳴其間，善哉殊復善，悲鳴在鳴其間，朝遊青冷，日莫嗟歸，蹙迫日莫，爲鵲南飛，繞樹三匝，何枝可依，卒逢風雨，樹折枝摧，雄來驚雌，雌獨愁棲，夜失羣侶，悲鳴徘徊，茈荊棘，葛生綿綿，感彼風人，惆悵自憐，月盈則沖，華不再繁，古來之說，嗟哉一言。

右二曲魏晉樂所奏

丹竇蔽日行

魏文帝

丹竇蔽日，采虹垂天，谷水潄潄，木落翩翩，孤禽失羣，悲鳴雲間，月盈則沖，華不再繁，古來有之，嗟我何言。

同前

曹植

紂爲昏亂，殘忠虐正，周室何隆，一門三聖，牧野致功，天亦革命，漢祖之興，階秦之衰，雖有南面，王道陵夷，炎光再幽，忽滅無遺。

折楊柳行四解

古辭

古今樂錄曰：王僧虔技錄云：折楊柳行，歌文帝西山古默默二篇，今不歌。

默默施行，遠厥罰隨，事來末喜，殺龍逢，桀放於鳴條，一祖伊言不用，紂頭懸白旄，指鹿用爲馬，胡亥以喪軀，二夫差臨命絕，乃云負子胥，戎王納女樂，以亡其由余，璧馬禍及號，三國俱爲墟，三夫成市虎，慈母投杼趨，卞和之刖足，接輿歸草廬。

同前四解

魏文帝

西山一何高，高殊無極，上有兩仙僊，不飲亦不食，與我一丸藥，光耀有五色，服藥四五日，身體生羽翼，輕舉乘浮雲，倏忽行萬億，流覽觀四海，茫茫非所識，彭祖稱七百，悠悠安可原，老聃適西戎，于今竟不還，王喬假虛辭，赤松垂空言，三達人識真偽，愚夫好妄傳，追念往古事，憤憤千萬端，百家多迂怪，聖道我所觀。

右二曲魏晉樂所奏

同前

陸機

邈矣垂天景，壯哉奮地雷，隆隆豈久響，華華恒西隤，日落似有竟，時逝恒若催，仰悲朗月運，坐觀璇蓋回，威門無再入，衰房莫苦闔，人生固已短，出處鮮爲諧，慷慨惟昔人，興此千載懷，升龍悲絕處，葛藟變條枚，瘠瘵豈虛歎，曾是感與摧，再意無足歎，願言有餘哀。

同前二首

謝靈運

鬱鬱河邊樹，青青野田草。合我故鄉客，將適萬里道。妻妾牽衣袂，收淚沾懷抱。還拊幼童子，顧託兄與嫂。辭訣未及終，嚴駕一何早。負笈引文舟，飢渴常不飽。誰令爾貧賤，咨嗟何所道。

騷屑出穴風，揮霍見日雪。颼颼無久搖，皎皎幾時潔。未覺泮春冰，已復謝秋節。空對尺素還，獨視寸陰滅。否桑未易繫，泰茅難重拔。桑梓迭生運，語默寄前哲。

西門行六解

古辭

古今樂錄曰：王僧虔技錄：西門行，歌古西門一篇，今不傳。樂府解題曰：古辭云：出西門，步念之，始言醇酒肥牛，及時為樂，次言人生不滿百，常懷千歲憂，晝短苦夜長，何不秉燭遊。終言貪財惜費，為後世所嗤，又有順東西門行，為二十七言，亦傷時顧陰，有類於此。

出西門，步念之，今日不作樂，當待何時。夫為樂為樂當及時，何能坐愁拂鬱。當復待來茲，二飲醇酒，食肥牛，請呼心所歡，可用解愁憂。三人生不滿百，常懷千歲憂，晝短而夜長，何不秉燭遊。四自非仙人，王子喬，計會壽命難與期，自非仙人，王子喬，計會壽命難與期。五人壽非金石，年命安可期，貪財愛惜費，但為後世嗤。六

右一曲音樂所奏

出西門，步念之，今日不作樂，當待何時。逮為樂，逮為樂，當及時，何能愁拂鬱。當復待來茲，釀美酒，炙肥牛，請呼心所歡，可用解憂愁。人生不滿百，常懷千歲憂，晝短苦夜長，何不秉燭遊。遊行去去，如雲除孽，車驅馬為自儲。

右一曲本辭

東門行四解

古辭

古今樂錄曰：王僧虔技錄云：東門行，歌古東門一篇，今

不歌樂府解題曰：古詞云：出東門，不顧歸，入門懷欲悲。言士有貧不安其居者，拔劍將去，妻子牽衣留之，願共鋪糜，不求富貴，且曰：今時清，不可為非也。若宋鮑照傷禽惡弦驚，但傷離別而已。

出東門，不顧歸，來入門，懷欲悲。盎中無斗米儲，還視架上無懸衣。拔劍出門去，兒女牽衣啼。他家但願富貴，賤妾與君共鋪糜。解共鋪糜，上用倉浪天，故下為黃口小兒。今時清，廉難犯教言，君復自愛莫為非。解今時清，廉難犯教言，君復自愛莫為非，行吾去為遲，平慎行，望君歸。四

右一曲音樂所奏

出東門，不顧歸，來入門，懷欲悲。盎中無斗米儲，還視架上無懸衣。拔劍東門去，舍中兒母牽衣啼。他家但願富貴，賤妾與君共鋪糜。上用倉浪天，故下當用此黃口兒。今非咄，行吾去為遲，白髮時下難久居。

東門行

張駿

勾芒御春正，衡紀運玉璣。明庶起祥風，和氣翕來征。慶雲蔭八極，甘雨潤四垓。昊天降靈澤，朝日耀華精。嘉苗布原野，百卉敷時榮。鵲鸞與鶯黃，間關相和鳴。芙蓉覆靈沼，香花揚芳馨。春遊誠可樂，感此白日傾。休否有終極，落葉思本莖。臨川悲逝者，節變動中情。

同前

鮑照

傷禽惡弦驚，倦客惡離聲。離聲斷客情，賓御皆涕零。涕零心斷絕，將去復還訣。一息不相知，何況異鄉別。遙遙征駕遠，杳杳白日落。日晚居人掩閨臥，行子夜中飯。野風吹草木，行子心腸斷。食梅常苦酸，衣葛常苦寒。絲竹徒滿座，憂人不解顏。長歌欲自慰，彌起長恨端。

同前

柳宗元

漢家三十六將軍，東方震動橫陣雲。雞鳴函谷客如霧，貌同心異不

可數赤丸夜語飛電光，微巡司隸眠如羊。當街一叱百吏走，馮敬胸中函匕首。兇徒側耳潛慄心，悍臣破膽皆杜口。魏王臥內藏兵符，子西掩袂真無辜。羌胡數下一朝起，敵國舟中非所擬。安陵誰辨削矚功，韓國詎明深井里。絕麟斷骨那下補，萬金龍贈不如土。

東西門行

劉孝威

古今樂錄曰：王僧虔技錄云：東西門行，今不歌。

廣津寒欲歇，聯櫓密纒收。天高匝近岫，江闊少方舟。錢淚留神眷，離歎切私傳。佇變齊兒俗，當傳楚獻囚。徒然頒並命，祗惡思如抽。

却東西門行

魏武帝

古今樂錄曰：王僧虔技錄云：却東西門行，荀錄所載武。帝鴻雁一篇，今不傳。

鴻雁出塞北，乃在無人鄉。舉翅萬餘里，行止自成行。冬節食南稻，春日復北翔。田中有轉蓬，隨風遠颺揚。長與故根絕，萬歲不自當。奈何此征夫，安得去四方。戎馬不解鞍，鎧甲不離傍。冉冉老將至，何時反故鄉。神龍藏深泉，猛獸步高岡。狐死歸首丘，故鄉安可忘。

右一曲魏晉樂所奏

同前

謝惠連

慷慨發相思，惆悵戀音徽。四節競蘭候，六龍引積機。人生隨時變，遷化焉可祈。百年難必保，千慮盈懷之。

同前

沈約

驅馬城西阿，遙眺想京闕。望極烟原盡，地遠山河沒。搖蕞非短展，還歌豈明發。脩服悵邊驛，瞻途眇鄉謁。馳蓋轉徂龍，回星引奔月。樂去哀鏡滿，悲來壯心歇。歲華委徂貌，年霜移暮髮。辰物久侵異，征思坐論越。清氣掩行夢，憂原盪瀾渤。一念起關山，千里顧兵窟。

鴻雁生塞北行

傅玄

鳳凰遠生海西，及時為山圖。五德存羽儀，和鳴定宮商。百鳥並待左

右，鼓翼騰華光。上熙遊雲日間，千歲時來翔。孰若彼龍與龜，曳尾泥中藏。非雲雨則不升，冬伏春逝驥退衰。此秋蘭草根絕，隨化揚靈氣。一何憂美，萬里馳芳芳。常恐物易微，歇一朝見棄忘。

順東西門行

陸機

古今樂錄曰：王僧虔技錄云：順東西門行，今不歌。

出西門，望天庭。陽谷既虛崦嵫盈，感朝露，悲人生。逝者若斯安得停，桑樞戒蟋蟀鳴。我今不樂歲事征，迨未^{一作莫}及時平置酒高堂宴友生，激朗笛，彈哀箏。取樂今日盡歡情。

同前

謝靈運

出西門，眺雲間。揮斤扶木墜虞泉，信道人鑒徂川。思樂暫捨誓不旋，閔九九傷牛山。宿心載違徒昔言，競落運務積年。招命儕好相追牽，酌芳醑，奏繁弦。惜寸陰，情固然。

同前

謝惠連

哀朝菌，閔積力。遷化常然焉肯息，及壯齒遇世直。酌醑華堂集親識，舒情盡懽遣悽惻。

樂府詩集卷第三十七

東吳毛晉訂正

男晨再訂

樂府詩集卷第三十八

太原

郭茂倩

編次

相和歌辭

瑟調曲

飲馬長城窟行

古辭

一曰飲馬行。長城秦所築以備胡者。其下有泉窟。可以飲馬。古辭云。青青河畔草。絲絲思遠道。言征戍之客。至於長城而飲其馬。婦人思念其勤勞。故作是曲也。酈道元水經注曰。始皇二十四年。使太子扶蘇與蒙恬築長城。起自臨洮。至于碣石。東暨遼海。西並陰山。凡萬餘里。民怨勞苦。故楊泉物理論曰。秦築長城。死者相屬。民歌曰。生男慎勿舉。生女哺用脯。不見長城下。尸骸相支柱。其冤痛如此。今白道南谷口有長城。自城北出。有高坂。傍有土穴。出泉。挹之不窮。歌錄云。飲馬長城窟。信非虛言也。樂府解題曰。古詞傷良人遊蕩不歸。或云。蔡邕之辭。若魏陳琳辭云。飲馬長城窟。水寒傷馬骨。則言秦人苦長城之役也。廣題曰。長城南有溪坂。上有土窟。窟中泉流。漢時將士征塞北。皆飲馬此水也。按趙武靈王既襲胡服。自代並陰山下至高闕。爲塞。山下有長城。武靈王之所築也。其山中斷。望之若雙闕。所謂高闕者焉。古今樂錄曰。王僧虔技錄云。飲馬行。今不歌。

青青河畔草。絲絲思遠道。遠道不可思。宿昔夢見之。夢見在我傍。忽覺在他鄉。他鄉各異縣。展轉不相見。枯桑知天風。海水知天寒。入門各自媚。誰肯相爲言。客從遠方來。遺我雙鯉魚。呼兒烹鯉魚。中有尺素書。長跪讀素書。書中竟何如。上言加飡飯。下言長相憶。

同前

魏文帝

浮舟橫大江。討彼犯荆虜。武將齊賁甲。征人伐金鼓。長戟十萬隊。幽冀百石弩。發機若雷電。一發連四五。

同前

陳琳

飲馬長城窟。水寒傷馬骨。往謂長城吏。慎莫稽留太原卒。官作自有程。舉築諧汝聲。男兒軍當格。關死何能怗。鬱築長城。長城何連連。連三千里。邊城多健少。內舍多寡婦。作書與內舍。便嫁莫留住。善事新姑嫜。時時念我故夫子。報書往邊地。君今出語一何鄙。身在禍難中。何爲稽留他家子。生男慎莫舉。生女哺用脯。君獨不見長城下。死人骸骨相撐拄。結髮行事君。慊慊心意關。邊地苦。賤妾何能久。自全。

同前

傅玄

青青河邊草。悠悠萬里道。草生在春時。遠道還有期。春至草不生。期盡歡無聲。感物懷思心。夢想發中情。夢君如鸞鵲。比翼雲間翔。既覺寂無見。曠如參與商。河洛自用固。不如中岳安。回流不及反。浮雲往自還。悲風動思心。悠悠誰知者。懸景無停居。忽如馳駟馬。傾耳懷音響。轉目淚雙墮。生存無會期。要君黃泉下。

同前

陸機

驅馬陟陰山。山高陰一作馬不前。往問陰山侯。勁虜在燕然。戎車無停軌。旌旆屢徂遷。仰憑積雪巖。俯涉堅冰川。冬來秋未反。去家邈以懸。獫狁亮未夷。征人豈徒旋。未德爭先鳴。凶器無兩全。師克薄賞行。軍沒微軀捐。將遵甘陳迹。收功單于旗。振旅勞歸去。受爵臺街傳。

同前

沈約

介馬渡龍堆。塗驚馬屢迴。前訪昌海驛。雜種寇輪臺。旌幕卷烟雨。徒御犯冰埃。

同前

陳後主

征馬入他鄉。山花此夜光。離羣嘶向影。因風屢動香。月色含城暗。秋聲雜塞長。何以酬君子。馬草報疆場。

同前

張正見

秋草朔風驚，飲馬出長城。羣鷺還怯飲，地險更宜行。傷冰斂凍足，畏冷急寒聲。無因度吳坂，方復入羌城。

同前

王褒

北走長安道，征騎每經過。戰垣臨八陣，旌門對兩和。屯兵戍隴北，飲馬傍城阿。雪深無復道，冰合不生波。塵飛陣聚沙，平騎跡多昏。昏隴坻月耿，耿霧中河羽。林猶角觝，將軍尚雅歌。臨戎常拔劍，蒙險屢提戈。秋風鳴馬首，薄暮欲如何。

同前

尚法師

長城征馬度，橫行且勞羣。入冰穿凍水，飲浪聚流文。澄鞍如瀆月，照影若流雲。別有長松氣，自解逐將軍。

同前

隋煬帝

蕭蕭秋風起，悠悠行萬里。萬里何所行，橫漠塞。一作長城豈台小子，智先聖之所營。樹茲萬世策，安此億兆生。詎敢憚焦思，高枕於上京。北河乘武節，千里卷戎旌。山川互出沒，原野窮超忽。探金止行陣，鳴鼓與士卒。千乘萬騎動，飲馬長城窟。秋昏塞外雲，霧暗關山月。緣巖驛馬上，乘空烽火發。借問長安侯，單于入朝謁。濁氣靜天山，晨光照高關。釋兵仍振旅，要荒事方舉。飲至告言旋，功歸清廟前。

同前

唐太宗

塞外悲風切，交河冰已結。瀚海百重波，陰山千里雪。迴戍危烽火，層巒引高節。悠悠卷旆旌，飲馬出長城。寒沙連騎迹，朔吹斷邊聲。胡塵清玉塞，羌笛韻金鉦。絕漠干戈戰，車徒振原隰。都尉反龍堆，將軍旋馬邑。揚麾氛霧靜，紀石功名立。荒裔一戎衣，雲臺凱歌入。

同前

虞世南

馳馬渡河干，流深馬渡難。前途錦車使，都護在樓蘭。輕騎猶衝勒，疑兵尚解鞍。溫池一作下絕瀾，棧道接危巒。拓地勳未賞，亡城律詎寬。

有月關猶暗，經春隴尚寒。雲昏無復影，冰合不聞湍。懷君不可遇，聊持報一餐。

同前

袁朗

朔風動秋草，清輝長安道。長城連不窮，所以隔華戎。規模唯聖作，荷負曉成功。鳥庭已向內，龍荒更擊空。玉關塵卷靜，金微路已通。湯征隨北怨，舜詠起南風。畫野功初立，綏邊事云集。朝服踐狼居，凱歌旋馬邑。山響傳鳳吹，霜華藻瓊餞。屬國擁節歸，單于款關入。日落塞雲起，驚河被原隰。零落葉已寒，河流清且急。四時徭役盡，千載干戈戢。太平今若斯，汗馬竟無施。唯當事筆硯，歸去草封碑。

同前

王翰

長安少年無遠圖，一生惟羨執金吾。駢騎前殿拜天子，走馬爲君西擊胡。胡沙獵獵吹人面，漢虜相逢不相見。遙聞擊鼓動地來，傳道單于夜猶戰。此時顧恩寧顧身，爲君一行摧萬人。壯士揮戈回白日，單于斃血染朱輪。回來飲馬長城窟，長城道傍多白骨。問之耆老何代人，云是秦王築城卒。黃昏塞北無人烟，鬼哭啾啾聲沸天。無罪見誅功不賞，孤魂流落此城邊。當昔秦王按劍起，諸侯膝行不敢視。富國彊兵二十年，築怨興徭九千里。秦王築城何太愚，天實亡秦非北胡。一朝禍起蕭牆內，渭水咸陽不復都。

同前

王建

長城窟，長城窟邊多馬骨。古來此地無井泉，賴得秦家築城卒。在人飲馬愁不回，長城變作望鄉堆。蹄跡未乾人去近，續後馬來泥汗盡。枕弓睡着待水生，不見陰山在前陣。馬蹄足脫裝馬頭，健兒戰死誰封侯。

同前

僧子蘭

遊客長城下，飲馬長城窟。馬嘶聞水腥，爲浸征人骨。豈不是流泉，終不成潑潑。洗盡骨上土，不洗骨中冤。骨若不流水，四海有還魂。空流

嗚咽聲聲中疑是言。

青青河畔草

王融

容容寒烟起，翹翹望行子。行子殊未歸，寤寐若容輝。夜中心愛促，覺後阻河曲。河曲萬里餘，情交襟袖疎。珠露春華返，瑤霜秋照晚。入室怨蛾眉，情歸爲誰婉。

同前

沈約

漢漢牀上塵，心中憶故人。故人不可憶，中夜長歎息。歎息想容儀，不言長別離。別離稍已久，空牀寄酒杯。

同前

何遜

春蘭已應好，折花望遠道。秋夜苦復長，抱枕向空牀。吹臺下促節，不言於此別。歌筵掩團扇，何時一相見。弦絕一作斷，猶依軫。葉落裁下枝，卽此雖云別，方我未成離。

同前

梁武帝

暮暮繡戶絲，悠悠懷昔期。昔期久不歸，鄉國曠音輝。音輝空結暹，半寢覺如至。既寤了無形，與君隔平生。月以雲掩光，葉似霜摧老。當途競自容，莫肯爲妾道。

同前

荀昶

熒熒山上火，蒼蒼隔隴左。隴左不可至，精爽通寤寐。寤寐食幃同，忽覺在他邦。他邦各異邑，相逐不相及。迷墟在望烟，木落知冰堅。升朝各自進，誰肯相攀牽。客從北方來，遺我端弋錦。命僕開弋錦，中有隱起珪。長跪讀隱珪，辭苦聲亦悽。上言各努力，下言長相懷。

泛舟橫大江

梁簡文帝

魏文帝飲馬長城窟，行曰：泛舟橫大江，因以爲題也。滄波白日暉，遊子出王畿。旁望重山轉，前觀遠帆稀。廣水浮雲吹，江風引夜衣。旅雁同洲宿，寒鳬夾浦飛。行客誰多病，當念早旋歸。

同前

張正見

大江脩且闊，揚舠度回磯。波中畫鷁涌，帆上錦花飛。舟移歷浦月，櫂舉逐春衣。王孫客若遠，詎待送將歸。

上留田行

魏文帝

古今樂錄曰：王僧虔技錄有上留田行，今不歌。崔豹古今注曰：上留田，地名也。人有父母死，不字其孤弟者，隣人爲其弟作悲歌，以風其兄。注曰：上留田，樂府廣題曰：蓋漢世人也。云里中有啼兒，似類親父子。回車問啼兒，慷慨不可止。

居世一何不同，上留田。富人食稻與粱，上留田。貧子食糟與糠，上留田。貧賤亦何傷，上留田。祿命懸在蒼天，上留田。今爾歎息將欲誰怨，上留田。

同前

陸機

嗟行人之謫，驛馬踰原風馳。輕舟汎川，雷邁寒往暑來。相尋零雪，霏霏集宇。悲風徘徊，入樓歲華冉冉方除。我思纏綿未紓，感時悼逝，悽如。

同前

謝靈運

薄遊出彼東道，上留田。薄遊出彼東道，上留田。循隴一何曠，曠上留田。澄川一何皎皎，上留田。悠哉遊矣，征夫上留田。悠哉遊矣，征夫上留田。兩服上阪，電遊上留田。舫舟下遊，驅上留田。此別既久，無適上留田。此別既久，無適上留田。寸心繫在萬里，上留田。尺素違此千夕，上留田。秋冬迭相去，就上留田。秋冬迭相去，就上留田。素雪紛紛鶴委，上留田。清風颯颯入袖，上留田。歲暮矣，增憂上留田。歲暮矣，增憂上留田。誠知運來詎抑，上留田。熟視年往莫留，上留田。

同前

梁簡文帝

正月土膏初欲發，天馬照耀動農祥。田家斗酒羣相勞，爲歌長安金鳳凰。

同前

李白

行至上留田。孤墳何嵒嶮。積此萬古恨。春草不復生。悲風四邊來。腸斷白楊聲。借問誰家地。埋沒蒿里塋。古老向余言。言是上留田。蓬科馬鬣今已平。昔之第死兄不葬。他人於此舉銘旌。一鳥死。百鳥鳴。一獸走。百獸驚。恆山之禽。別離苦。欲去迴翔不能征。田氏倉卒骨肉分。青天白日摧紫荆。交柯之木本同形。東枝顛覆西枝榮。無心之物尚如此。參商胡乃尋天兵。孤竹延陵。讓國揚名。高風緬邈。續波激清。尺布之謠。塞耳不能聽。

同前

僧貫休

父不父。兄不兄。上留田。蠶賊生。徒跽崗。淚嵒嵒。我欲使諸凡鳥雀。盡變爲鶻鵂。我欲使諸凡草木。盡變爲田荆。隣人歌。隣人歌。古風清。清風生。

新城安樂宮

梁簡文帝

古今樂錄曰。王僧虔技錄有新城安樂宮行。今不歌。樂府解題曰。新城安樂宮行。備言雕飾刻鏤之美也。

遙看雲霧中。刻楨映丹紅。珠簾通曉日。金華拂夜風。欲知歌管處。來過安樂宮。

同前

陰鏗

新宮實壯哉。雲臺望樓臺。迢遞翔鶴仰。聯翩賀燕來。重簾露簾宿。返景夏蓮開。砌石披新錦。花梁畫早梅。欲知安樂盛。歌管雜塵埃。

同前

陳子良

春色照蘭宮。秦女且隨中。柳葉來眉上。桃花落臉紅。拂塵開扇匣。卷帳却薰籠。衫薄偏憎日。裙輕更畏風。

安樂宮

李賀

深一作井。桐鳥起。尚復牽清水。未望邵陵王。瓶中弄長翠。新城安樂宮。宮如鳳凰翅。歌迴蠟板鳴。大綰提壺使。一作左輔。綠繁悲水曲。葉

莫別秋子。

婦病行

古辭

婦病連年。累歲傳呼丈人前。一言當言未及得。言不知淚下。一何翩翩。屬累君兩三孤子。莫我兒飢且寒。有過慎莫言。行當折搖。思復念之。亂曰。抱時無衣。襦復無裏。閉門寒牖。舍孤兒到市。道逢親交。泣坐不能起。從乞求與孤買餌。對交啼泣。淚不可止。我欲不傷悲。不能已。探懷中錢持授交。入門見孤兒。啼索其母抱。徘徊空舍中。行復爾耳。棄置勿復道。

同前

江總

窈窕懷貞室。風流挾琴婦。唯將角枕臥。自影啼妝久。羞開翡翠帷。嬾對蒲萄酒。深悲在綠素。託意忘箕箒。夫婿府中趨。誰能大垂手。

孤兒行

古辭

孤子生行。一曰孤兒行。古辭言孤兒爲兄嫂所苦。難與久居也。歌錄曰。孤子生行。亦曰放歌行。樂府解題曰。鮑照放歌行云。羣蟲避葵藿。言朝廷方威。君上好才。何爲臨歧相將去也。

孤兒生。孤子遇。生命獨當苦。父母在時。乘堅車。駕駟馬。父母已去。兄嫂令我行。買南到九江。東到齊。與魯。臘月來歸。不敢自言苦。頭多纍風。面目多塵。大兄言辦飯。大嫂言視馬。上高堂。行取殿下堂。孤兒淚下如雨。使我朝行汲。暮得水來歸。手爲錯。足下無菲。愴愴履霜。中多蒺藜。拔斷蒺藜腸。月中懷欲悲。淚下漂漂。清涕霏霏。冬無複襦。夏無單衣。居生不樂。不如早去。下從地下。黃泉春氣動。草萌芽。三月蘊桑。六月收瓜。將是瓜車。來到還家。瓜車反覆。助我者少。啗瓜者多。願還我。藉兄與嫂。嚴獨且急歸。當與校計。亂曰。里中一何譊譊。願欲寄尺書。將與地下父母。兄嫂難與久居。

放歌行

傅玄